

Polis!

Tempu mi tabata mucha, un anochi un amigu ku mi a kai riba e idea pa tira piedra na otro banda di kaya (Koninginneweg e tempu ei) promé ku outo pasa. Tur kos a bai bon, te ora mi amigu a manda un piedra nèt ora outo tabata bin. Outo a para! Nos a skonde! Mi kurason a bati duru! E shafùr rabiá a haña sa di e bisña den kurá ken a manda e piedra. Promé ku e hòmber a subi outo bai, el a anunsiá ku e ta bai polis.

Spantá, mi a bai kas, kontu mi mayornan loke a sosodé, i a logra pega soño promé ku polis a yega. Mi amigu, ku no tabata na soño ora polis a bati na porta, a haña un bon skual. Mi no sa di dje, ma ami sigur nunca mas a hunga e “wega” ei.

Hopi mayor ta usa e palabra “Polis!” pa spanta nan yunan! Ma **polis no ta un “boeman”** kla pa spanta hende. E t’ei pa sirbi su pais...i abo! Ken ta vigilá bo barío mientras abo ta drumi dushi di bo riba bo kama madrugá? Ken ta pone su bida na peliger pa sigurá ku abo por biba trankil? Ken ta intermediá ora bo tin problema ku bo bisña ku bo no por resolvé?

Algun aña pasá, mi tabatin problema ku outo. Radjetor a lagámi na kaya...literalmente. Mi a hañami obligá di bandoná outo kantu di kaminda i kamna un distansia pa pidi awa na un kas. Ora mi tabata regresá ku e awa, outo di polis a bin para tras di mi outo. E agente polisial tabata kla pa yuda i asta a kompañá mi pa sòru ku mi por yega unda mi por haña yudansa.

Polis sigur no ta “boeman”! Nos mester tin e mentalidat—i siña nos yunan—ku **polis ta nos amigu**. Un teksto den Skritura, (Romanonan 13:1-7) ta papia bon kla di gobernantenan i nan representantenan. Beibel ta bisa, “...*governantenan* (inkluyendo polis) *no ta un kousa di temor pa esnan ku ta hasi bon, sino pa esnan ku ta hasi malu*” (13:3). Tempu mi tabata mucha, mi tabatin miedu di polis, pasobra mi amigu ku mi no a hasi bon. Ma ora mi outo a dañá, mi tabata kontentu pa presensia di polis!

Polis ta hende, i hende ta faya i kiboka. Sigur tin momentu ku un agente polisial ta bisa òf hasi kos ku no ta kuadra ku loke el a huramentá. Ma esei no ta duna nos e derechu di falta ku respèt pa ku polis. (Ta bon pa kòrda ku apostel Pablo a skirbi pa respetá outoridat [13:1-7] den era di impero romano, tempu ku emperadónan tabata inhustu, korupto, i burdugu. El a skirbi pa respetá e mesun outoridatnan ku despues di tempu a mat’è!)

Hende ta kla pa tuma polis na malu ora nan tin ku baha ku man duru riba nan òf un ser kerí. Ma nan no ta para ketu i pensa ku nan a buska problema pa nan mes. Ora un agente polisial ta hañ’é obligá pa tira un malechor—tin ora ku konsekuensia fatal—hende ta menas’è i papia tur klase di ko’i abuso di e persona ku simpelmente tabata hasi su trabou. Ma kòrda ku den kasonan asina, hopi agente polisial ta sufri emoshonalmente i ta keda ku un trouma for di kua nan difisilmente ta rekuperá.

Di otro banda, ta bon pa sierto hende tin miedu di polis! Palabra di Dios ta bisa, “*Si bo hasi loke ta malu, tene miedu; pasobra e no ta karga spada pornada*” (13:4). Dios a outorisá polis pa karga arma pa mantené ordu. Den era di Beibel, polis tabata armá ku spada; awendia polis tin pistol. **E pistol no ta pa prònk**. E menasa di usa arma òf e uso mes di dje ta enfatisá outoridat di e polis. Si polis no tabatin pèmit pa usa arma, nos komunidad lo tabata un lugá muchu mas sigur pa biba.

Ta interesante ku e ser humano ta rekonosé ku e ta malu. Nos ta tan konvensé di nos maldat ku nos ta selektá un grupo di hende, eduká nan, arma nan, i paga nan pa sera nos ora nos hasi malu. I pa kolmo nos maldat ta reflehá pasobra nos ta tuma nan na malu ora nan ta hasi loke nos ta paga nan pa hasi!

Polis tin un trabou difisil. Nos mester ta masha agradisidu pa e trabou ku nan ta hasi apesar di nan luchanan, pasobra e **ningun di nos ta deseá e alternativa: un isla sin polis**.